

DIA INTERNACIONAL DI HENDE MUHER**Encuentro cu Glenda Krozendijk****“ENSEÑANZA, CAS Y COMUNIDAD MESTER TA HOPI CERCA DI OTRO!”**

Glenda Krozendijk, docente na Colegio Paso Sigur, ta simplemente un dama Arubano di hopi calidad humano, y un profesional den tur extension di palabra. Durante un encuentro ameno DIARIO a entrevista Glenda, en conexión cu Dia Internacional di Hendu Muher, cu ta worde celebra Diadomingo 8 di Maart awor.

TRAYECTORIA

Pa haci un repaso cortico riba su trayectoria por bisa cu Glenda a lanta na Santa Cruz, den Cero Biento. Mientras su rumannan a bay scholnan di Playa, e ta unico cu a studia na Santa Cruz mes. El a caba su estudio secundario na St. Antonius College (awe Colegio San Antonio) y a solicita pa drenta Colegio Arubano, loke pa motibo fuera di su voluntad e no a logra. “Mi ta corda cu e tempo ey un di mi rumannan homber tabata bayendo Colegio, y

mi tata a ricibi un yamada pa punte ta con e ta bay haci pa paga dos estudio. Eynan caba bo por a ripara e actitud discriminativo pa cu clasenan social. Esaki a desajunta ami y mi tata hopi”.

For di 6de klas caba Glenda a pasa cu exito e testnan pa bay Colegio pero e no a bay. El a bolbe pasa test ora el a bay MULO hunto cu un otro mucha muher, pero tampoco nan no a haya e chens apesar cu nan a siña na un manera fantastico. “Di eerste klas te 6de semper mi tabata sali e prome den-clas, pero tog mi no a logra di bay Colegio”. Hecho cu Glenda no a bay Colegio no kiermen cu mundo a caba pe. El a scoge pa bira juffrouw di school y a logre tambe, cu ayudo y motivacion di Zuster Cecilia, cu a propone pa e studia pa maestra di school preparatorio.

“En total estudio a bira 3 año; nos a bay prome San Nicolas y despues nos a bay Academia Pedagogico Arubano (APA). Opleiding tabata dividi den 3 año, dos año tabata nivel A y un año tabata B. Mi a pasa tur e añanan aki y despues mi a cumenza traha na Santa Cruz”.

Den su amplio trayectoria Glenda a traha na Direccion di Enseñanza yama e tempo ey Pedagogisch Didactiek Bureau (PDB) unda mi tabata encarga pa guia maestronan cu e proyecto “Lenga y Pensamento”.

INTERES PA TRABAO SOCIAL

Glenda mes a lanta Macuarima Kleuterschool unda el a topa cu hopi problema social loke a motive pa bishita hopi mayor y traha cu nan. E ta corda cu hasta el a introduci un corant den school. E temporada aki el a descubri su habilidad pa haci trabao social.

“Mi a traha den Inspeccion di Enseñanza y e tempo ey mi a cumenza sinti cu mi tin hopi habilidad pa trabao social. Mi tabata compronde e problemanan pero hopi biaha mi no tabata sa con pa solucionan nan.

Tambe mi a haci un estudio di enseñanza special pa traha muchanan cu dificultad pa siña, cual a dura dos año y cu mi a caba cu exito”.

Despues di e estudio aki Glenda a dicidi di bay Hulanda pa sigui studia. Den e mesun periodo el a



conoce Jose Fernandez Perna (su casa) cu e tempo ey tabata bay APA. Ambos a bay Hulanda pa sigui studia y Glenda a drenta na Academia di Trabao Social.

“Mi a core mi pasantia na Hulanda terminando cu un investigacion chiquito. Prome cu mi a caba mi estudio, mi a haya trabao parti time, den e mesun instancia unda mi a core stage, cu tabata un experiencia fantastico pasobra e ta un instancia masha grandi mes cu ta guia maestro y mayoran. Ora mi a caba mi opleiding mi a sigui traha den e instancia aki durante 4 año y mei”.

Glenda a haya experiencia den diferente nivel di enseñanza: entre otro, pa traha cu muchanan cu dificultad pa siña, cu muchanan handicap.

“Riba e cuatro año y mei di estudio mi a scoge pa studia dos año mas, loke a haci cu mi ta califica pa duna enseñanza na un nivel halto, e.o na IPA. Mi a hinca tur mi estudio den direccion di enseñanza, comunidad y e parti social”.

Tempo cu Glenda a bolbe Aruba a bay traha cu FAVI unda el a keda 8 año y mei, den e funcion di director. Despues el a drenta den e tereno di enseñanza na Colegio Paso Sigur, unda el a yena un puesto vacante, y aworaki e bayendo pa su di 4 año como docente den dicho school.

COMO EDUCADOR

E satisfaccion mas grandi cu Glenda tin den su tarea di educador ta di trece su conocimiento na estudiante-

nan.

“Mi ta kere cu como educador y como ser humano bo tin cu wak tambe kico ta e necesidad, kico ta e talento y kico ta e posibilidadnan di e studiantenan. Pesey nos tin e tarea di guia e estudiante, saca su talento, y mustre riba su habilidadnan cu e por logra, cu e por traha bon. Ami sigur por bisa cu abo como docente, ta nace!”.

Dentro di e proceso di formacion aki, a traves di e modulen no solamente ta wak si e studiantenan ta capta e teoria, pero tambe si e ta manifesta su mes como estudiante y como persona.

“Asina bo ta ripara si e estudiante ta durf di bin pa dilanti, expresa su pensamiento riba cierto materianan cu tin di haber cu nan mes. Ey bo ta mira si e hoben ta cuida di su mes, si e tin fe den su mes, y si e tin e confianza.

Nos no ta haya studiantenan cla, pero ta nos tarea pa guia e proceso di siña”.

Glenda ta indica cu ningun educador mester lubida cu cada estudiante ta bin cu su norma y balornan di cas, unda el a pasa caba den cierto proceso.

“Hopi biaha e cultura di cas ta diferente na e cultura na school, y e studiantenan ta sinti cu na school nan ta existi hopi di nan, pa nan ta independiente, cu por tuma nan mesun decision y duna nan opinion. Pesey nos ta siña nan tambe con nan tin cu siña anda cu e situacion aki. Pesey mi ta kere cu enseñanza, cas y comunidad mester ta hopi cerca di otro, sin ningun distancia ni frontera cu separa nan”.



**E ta Wela, Mama, Yiu....
*E ta Ama di Cas, Profesional
y trahado...
*E ta simplemente un
Muher....*

Feliz Dia di Hendu Muher!!

FIRST NATIONAL BANK OF ARUBA
ARUBA TRUST KANTOOR N.V.
Banco Nacional de Hipotecas N.V.